

Carta na_{ca}hyí Santiago nuú na cúu cuéntá Jesús

Cáhan Ndióxi Santiago xihín na cúu cuéntá Jesús

1 Yehe cúu Santiago, da cája chúun cuéntá Ndióxi ta cája chúun i cuéntá Jesucristo, xitoho í. Chíndahá i Ndióxi coo na Israel, na cúu cuéntá Jesús, mé na nandicuíta nuu ndúu níi cúu ñuyívi.

Ndaja caja í candaa iní ña cúní Ndióxi caja í

²Cuni johu vaha ndó, ñani mí i, na cúu cuéntá Jesús. Ndítahan cájii ini ndó tá vaxi tá nuú ña ndóho ini ndó. ³Jáchí sa xíní ndo ña tá ndóho ini ndó sahá ña cándéé ini ndó Jesucristo já quéa catiahva chága ndó quiahva ndeé ini ndó sahá ña ndóho ini ndó. ⁴Quiahva ndeé ini ndó tá ndóho ini ndó anda quiahva ná xinu coo ña cúní Ndióxi já quéa cacuu ndó ñayivi ndaa nu mé á. Ta cuahnu vaha ndó xihín tuhun a ta ni in ñaha a cámaní ga nu ndo.

⁵Tá co cándaa ini ndó ña cúní Ndióxi caja ndó já quéa xíní ñúhú caca tahví ndó nu mé á ta quiahva mé á cuahá ña candaa ini ndó. Jáchí co ndáhví cúu ini a quiahva ña nuú ndihi ñayivi. ⁶Joo tá xíca tahví ndo nu Ndióxi xíní ñúhú cándéé ini ndó mé á ta a cáhvi ivi johu ini ndó jáchí mé na cáhvi ivi johu ini, na cán cúu na tátuhun tañuhú tá ndácojo do cája tachi. Ta co iin táji do jáchí xíca dó tá xoo yóho tá xoo cáa cája tachi. ⁷Jáchí tá ná cahvi ivi johu ini na já quéa a cáhán na ña quiahva Ndióxi ñaha nu ná. ⁸Mé na cáhvi ivi johu ini co xíca ndaa na ta tucu tucu ndíjama na íchí nu xíca na.

⁹Ta na cúu cuéntá Jesús tá cúu ná na ndahví ndítahan cájii ini na jáchí na náhnu cúu ná nu Ndióxi. ¹⁰Ta na cuicá, na cúu cuéntá Jesús ndítahan cajii ini na jáchí co yáhvi toho jiihún na nu Ndióxi. Jáchí tá quiahva iin itá yucu yachi íchí a ta ndicava ña quiahva já yachi quivi na cuicá.

¹¹Jáchí tá naxinu coo candii ta nacahihní já quéa cama ndivaha íchí mé yucu ta ndicava ita nu á. Já ndihi va ña ñúchí ndáa jáchí nandihí sahá. Quiahva já ndoho na cuicá jáchí jonáa va ndihi saha ná ta jándicoo na ña cája na.

Tá ndóho ndó tondóhó

¹²Ndaja táhvi nacuu na sáhan ndeé ini tá ndóho ini na jáchi tá nandihí nasáhan ndeé ini na já quéa ñehe táhvi ná coo na xihín Ndióxi anda ama cáa quívi. Jáchi nasáhan Ndióxi tuhun a nu yo ña tá cúní yo mé á já quéa coo í xihín á anda ama cáa quívi. ¹³Tá ná ndicají ini ndó caja ndó ña núu já quéa a cáhan ndo ña xító ndojó Ndióxi ndohó. Jáchi a cúu caja Ndióxi ña núu ta co cúní a ña ná caja ñayivi ña núu. ¹⁴Joo tá cája ndó ña núu cúu á sahá ña xíca ini ndó caja ndó ña ta xihín ña yóho ndicava ndó nuú cuachi. ¹⁵Jáchi sahá ña núu xíca ini ñayivi caja na sahá ña cán cásahá na cája na cuachi. Ta tá sa nandicuahá cuachi na já quéa cuhun na चाहvi na sahá ña cája na ini indayá anda ama cáa quívi.

¹⁶Cúní ndivaha í ndohó, ñani mí í na cúu cuéntá Jesús. A jándahvi ndó mé ndó. ¹⁷Jáchi tóco ndihí ña vaha quíxi a indiví nu íin Ndióxi ta mé á sáhan ña vaha nu yo. Já íin va Ndióxi jáchi cája tá cája ña vaha cuití va. Ta co ndíjama toho Ndióxi. Ta mé Ndióxi, tátá yo nacavaha ña ndíyéhe íin indiví. Ta ndá tañu ndíjama táhan ña íin indiví joo Ndióxi co ndíjama toho a. ¹⁸Jáchi cúní Ndióxi jácacu a mí sahá ña cándúsa í tuhun mé á ña cúu ña ndaa. Jáchi cúní Ndióxi ña ná cacuu na nu cuítí tañu tóco ndihí ñaha nacavaha mé á.

Ndaja caja í ndiquehe vaha í tuhun vaha cáhan sahá Jesús

¹⁹A ndíndójó ndo ña cáhan í xihín ndo jáchi cúní ndivaha í ndohó, na cúu cuéntá Jesús. Ndítahan nu ndó cuni johó vaha ndó tá cáhan inga na xihín ndo. Ta a cácoma ini ndó nducú ñehe ndó tuhun ña cáhan inga na xihín ndo. Ta a cójo ini ndó xihín ná. ²⁰Jáchi tá xójo ini ndó xihín inga na já quéa cája ndó ña co cúní Ndióxi. ²¹Ña cán quéa cacu xóo ndó ndihí ña núu ta jándicoo ndó ndihí cuachi cája ndó jáchi ndúu cuahá na cája tá nuú cuachi tañu ndó. Joo xíní ñúhú jánuu ndáha ndó mé ndó nu Ndióxi ta ndiquehe vaha ndó tuhun mé á ña nacahan na xihín ndo jáchi tá ná candúsa ndó ña já quéa jácacu Ndióxi ndohó.

²²Xíní ñúhú candúsa ndó caja ndó tuhun Ndióxi jáchi co yáhvi toho a tá xíní johó uun va ndó ña. Ta xihín ña yóho jándahvi ndó mé ndó. ²³Ndá na co cándúsa caja ña cáchí tuhun Ndióxi cúu ná tátuhun in da sándehe nuú nuú yutátá. ²⁴Tá nandihí nasándehe da nuú dá já quee da cuahan da ta cama chá ndíndójó da ndaja cáa nuú dá. ²⁵Joo mé ñayivi tá jácuaha na tuhun Ndióxi ta co ndíndójó na caja na ña cáchí a já quéa caja yíi Ndióxi tóco ndihí ña cája na jáchi ña ndaa cúu tuhun Ndióxi. Tá cája í ña sáhdá tuhun Ndióxi nu yo caja í já quéa co sáhdá ga cuachi chuun nu yo ta já ndinuhu iní caja í ña cúní Ndióxi.

²⁶Cúú á tátuhun tá iin in dataa tañu ndó ta cáhan da cája da ña cuni Ndióxi joo co ndáa da yúhu dá tá cáhan da sahá ñani táhan da já quea jándahvi da mé va da ta coó saha toho ña cája da nu Ndióxi jáchi co cája da ña cáchí tuhun Ndióxi. ²⁷Jáchi tá mé a ndaa nandihvi in da íchi cuénta Jesús já cúú dá taa ndaa nu Ndióxi, tátá yo. Ta chindee da na cuaan ta chindee da na sanchó tá ndóho ini na. Ta candeé ini da Ndióxi ta tává da mé dá nuú cuachi jáchi co cája da ña núu tá quiahva cája ñayivi ñuyívi.

A cája ichi ini ndó xihín na ndahví

2 Cunijoho vaha ndó, ñani mí i, na cúú cuénta Jesús. Mé ndó candeé ini ndó Jesucristo, xitoho í, mé a cúú ña cáhnu ndivaha. Ndítahan quihvi ini ndó na ndahví tá quiahva quihvi ini ndó na cuicá. ²Ña ndítahan caha ndó cúú ña yóho: Tá ná taca ndó caha cáhnu ndó Ndióxi ta vaxi in da cuicá ndihvi da nu táca ndo ta ndíxi da jáhma vaha ndivaha ta ndacaan jéhe jiu hun cuaan nducu ndáha dá. Ta mé tañu já vaxi in da ndahví, da ndíxi jáhma núu ña yatá. ³Ta ndíquehe vaha ndó mé da cuicá ta cáchí ndó xihín dá: “Silleta vaha coo ndó”, cáchí ndó xihín da cuicá. Joo xihín da ndahví cáchí ndó já: “Candichi ndó jan á coo ndó nu ñúhu yóho”, cáchí ndó xihín da ndahví. ⁴Tá cája ndó ña yóho já quea cája ichi ini ndó xihín da ndahví ta cája cáhnu ndó da cuicá sahá jiu hun da. Ta cáhvi núu ini ndó jáchi cáhan ndo ña iin chága sahá da cuicá a juú ga da ndahví.

⁵Cúni ndivaha i ndohó, ñani i, na cúú cuénta Jesús. Ña cán quea cúni ña ná canda vaha ini ndó ña nacaxi Ndióxi na ndahví ndúu ñuyívi yóho ná cacuu na na náhnu nu Ndióxi tá candeé ini na mé á. Jáchi nasahan Ndióxi tuhun a nuú ndihi na cán ña ná cacúni na mé á já quea ñehe táhvi ná cuhun na indivi coo na xihín mé á anda ama cáa quivi. ⁶Joo mé ndó cája ichi ini ndó xihín na ndahví. Á co ndícu hun ini ndó ña mé na cuicá cúú ná na cája xixi xihín ndó ta ñúhu na ndohó cuahan na nuú na jutixia chícáan na cuachi jata ndo. ⁷Jáchi mé na cuicá cáhan núu na saha Jesucristo ta mé ndó cúú ndó cuénta mé á.

⁸Sáhn dá tuhun Ndióxi chuun nu yo já cáchí a já: “Tá quiahva quihvi ini ndó mé ndó quiahva já ndítahan quihvi ini ndó ñani táhan ndó”, cáchí tuhun Ndióxi. Tá ná caha ndó ña cáchí a yóho já quea cája vaha ndó jáchi ña yóho cúú á ley cáhnu nu Ndióxi. ⁹Joo cája ndó cuachi nu Ndióxi tá ndíquehe vaha chága ndó na cuicá a juú ga na ndahví. Ta xihín ña yóho chícáan ley Moisés cuachi jata ndo. ¹⁰Jáchi vatí nasacu vaha in ñayivi ndihi ley Moisés joo sahá in ñaha coó nacaja na sahá ña cán quea ndójo na cuachi saha tóco ndihi ley. ¹¹Jáchi sa mé Ndióxi cáchí a já: “A quihvi nuu ndó xihín ñájíhí ñani táhan ndó”, ta já cáchí tucu a já: “A cáhni ndó ndii”, cáchí a. Ña cán quea cája ndó cuachi nu Ndióxi tá sáhní ndo ñayivi vatí co

quihvi nuu ndó coo ndó xihín ñájíhí ñani táhan ndó. ¹²Ndítahan caja vaha cuití va ndó ta cahan ndaa cuití va ndó jáchi vaxi quivi caja vií Ndióxi saha yó xihín ley mé á ña jácacu mí. ¹³Tá co táhnda ini ndó sahá ñayivi já quéa a táhnda ini Ndióxi saha ndó tá ná casaa quivi caja vií a sahá cuachi nacaja ndó. Joo tá natahnda ini ndó sahá ñayivi já quéa quee vaha ndó tá ná caja vií Ndióxi sahá ña nacaja ndó ñuyiví yóho.

Tá cándée iní Ndióxi já cája í ña cúní mé á

¹⁴Cuni johu vaha ndó, ñani mí i, na cúu cuéntá Jesús. Tá cáchí ndo cándée ini ndó Jesucristo joo co cája ndó ña vaha já quéa co yáhvi toho nu Ndióxi ña cándée ini ndó mé á. Ta sahá ña yóho a cúu toho jácacu Ndióxi ndohó. ¹⁵Cúu á tátuhun tá íin in na cúu cuéntá Jesús ta cámaní jáhma candixi na ta cámaní ña cuxu na quivi víti. ¹⁶Ta cáchí ndo xihín na cán já: “Ná coo vahún ta ná candixi vahún ta ná cuxu vahún”, cáchí ndó xihín ná. Joo co sahan ndó jáhma candixi na ta ni ña cuxu na co sahan ndó nu ná ña cán quéa coó chuun cúu ña cahan ndo xihín ná. ¹⁷Ña cán quéa tá cáchí ndo cándée ini ndó Jesucristo joo co cúní ndó caja ndó ña vaha, ña cúní Ndióxi caja ndó já quéa mé a uun cándúsa ndó Jesucristo.

¹⁸Tá íin in da cúu cuéntá Jesús ta co cúní da caja da ña cúní Ndióxi já quéa co jánaha da nuú ñayivi ña mé a ndaa cándée ini da Jesucristo. Tá íin inga da ta cája tá cája da ña cúní Ndióxi já quéa jánaha da nuú ñayivi ña mé a ndaa cándée ini da Jesucristo. ¹⁹Tá cándúsa ndó ña íin in tálaá cuití Ndióxi já quéa vaha cája ndó. Jári rí quini cándúsa rí ña íin in tálaá cuití Ndióxi. Joo co cándúsa rí caja rí ña cúní Ndióxi ta yíhvi ndivaha rí mé á janda quíji ninu rí. ²⁰Á nacatóntó jini ndo. Candehé vaha ndó. Tá cáchí ndo cándée ini ndó Ndióxi joo co náha ndó xihín ña cája ndó ña mé a ndaa cándée ini ndó mé á já quéa coó saha mé va ña cája ndó. ²¹Á co ndícuhun ini ndó Abraham, tásáhnú jícó yo. Nandiquehe vaha Ndióxi Abraham sahá ña nacaja da ta cáchí Ndióxi ña cúu dá taa ndaa nu mé á jáchi nacandúsa mé Abraham cahní da Isaac, jahyi da, ña joco ñahá da nu mé á. ²²Candehé ndo. Tá nacandúsa Abraham joco da jahyi da nu Ndióxi já najánaha da nuú ndihi ñayivi ña cándée ini da Ndióxi. Ta sahá ña nacaja da já naxinu coo da cándée cáhnú ini da Ndióxi. ²³Jatá ña nacaja Abraham naxinu coo tuhun Ndióxi tá cáchí a já: “Nacandée ini Abraham Ndióxi ña cán quéa nanduu da taa ndaa nu mé á”, cáchí tuhun Ndióxi. Nacachi na sahá Abraham ña cúu dá da nandique táhan máni xihín Ndióxi.

²⁴Ña cán quéa cándaa vaha iní ña nduu ndaa yo nu Ndióxi sahá ña cándée iní Ndióxi anda quiahva cándúsa í caja í ña cúní mé á. ²⁵Já nayaha xihín Rahab, mé ña naxica jii sanahá ndivaha. Nanduu ndaa ña nu Ndióxi sahá ña nacaja ña xihín ñayivi Israel jáchi nandiquehe vaha ña java dataa

nachindahá Josué ñuu Jericó. Ta nachindeé ñá da ña ná ndijama da íchi nuú cuhun da. ²⁶Ña cán quéa tá cáchi yó cándusa í Ndióxi joo co cája í ña cúni mé á já quéa cúu yó tátuhun ñayivi sa naxihi, na sa cuahan ínima.

3 Cunijoho vaha ndó, ñani mí i, na cúu cuéntá Jesús. A ndúcú cuaha ndó cacuu ndó na jánaha tuhun Ndióxi nuú ñayivi jáchi cándaa vaha ini ndó ña tá co jánaha ndó ña ndaa já quéa jándoho chága Ndióxi ini ndó a juú ga java ga ñayivi. ²Tócó ndihí cája cuaha yó cuachi. Joo ndá na cuu cahnda chuun nu yúhu ná ña ná a cáhan quini a já quéa cuu cahnda na chuun nuú yiquí cuñu na viti ña ná a cája na cuachi ta já xinu coo na cacuu na ñayivi ndaa nu Ndióxi. ³Á co ndícuhun ini ndó ndaja chícáan na in freno yúhu cuáyí ña ná candaca na ri. Vatí loho ndivaha cúu mé freno joo cuu cañehe na rí nu cúni mé ná cuhun na. ⁴Candehé ndó in barco. Vatí cáhnu ndivaha cúu dó ta vaxi tachí ndeé ndivaha joo mé da ñéhe dó cuu candaca da do xihín in timon loho ta cuu cañehe da do cuhun dó nu cúni mé dá. ⁵Tá quiahva sáhndá na chuun nu cuáyí xihín barco quiahva já cája í xihín yúhu yó. Vatí loho ndivaha cúu mé yúhu yó joo xihín mé yúhu yó cuu caja cáhnu í mé ví. Candehé ndo ndaja náhnu yúcu jáquihvi ñúhu in titó loho tá ndicava dó nu á ta chícáyí yúcu anda quiahva ndihi sahá. ⁶Tátuhun in ñuhú cáyí cúu yúhu yó. Cúu á in ña núu ndivaha ndacaan tañu yiquí cuñu í ta játiví ndihi a mí. Ta cúu á tátuhun ña sa mé indayá sáhan chága ví a ñúhu nu á ña ná caja quini a ta jándihi a saha yó. ⁷Vatí ñayivi cándeé na sáhnú na nu tóco ndihi quítí xihín laa xihín coo xihín quítí ñúhu tañuhú ta cúu sáhndá na chuun nu ri. ⁸Joo ni in ñayivi a cuú cahnu na yúhu na jáchi co sáji yó yúhu yó tá cáhan quini sahá ñayivi. Cúu á tá quiahva cája coo tá tñin rí ñayivi chícáan rí veneno rí na já sáhní rí na. ⁹Xihín mé yúhu yó cuahá tañu cája cáhnu í Ndióxi ta sa xihín mé yúhu yó yóho cánahá yó xihín ñayivi, na nacavaha Ndióxi yuhú nuu mé á. ¹⁰Ndá tañu cáhan vaha í xihín yúhu yó ta java tañu quini cáhan yó xihín mé yúhu yó. Candehé ndó, ñani mí i, na cúu cuéntá Jesús. Co ndítahan toho caja í ña yóho. ¹¹Jáchi cúu á tátuhun in chícóho nu cána ticuíí. A cuú cana ticuíí vijí xihín ticuíí ova ini in chícóho. ¹²Ta sa xíní vaha ndó, ñani mí i ña in titó ñuhú co sáhan dó aceituna jáchi cúu dó titó ñuhú va. Já in yucu uva co sáhan toho a titó ñuhú jáchi cúu á yucu mé uva va. Ña cán quéa sa xíní vaha ndó ña co ñúhu ticuíí vijí xihín ticuíí ova ini in chícóho.

Ndaja íin na ndíchí jini cuéntá Ndióxi

¹³Tá íin in taa ndíchí, da tácu ini tañu ndó já quéa ndítahan caja vaha da ta xihín ña yóho jánaha da nuú ñayivi ña cúu dá taa ndíchí. Tá co cája lándá da sahá ña cája da já quéa jánaha da nuú ñayivi ña mé a ndaa cúu dá taa ndíchí. ¹⁴Tá ná ndicutú ndaa ini ndó xihín ña ihvi ini ndó já quéa a

cáhan ndo cúu ndó na ndichí. Ta tá ná cajú ndó ñaha sahá ña cúní ndó ndínehe jícó ndo mé ndó já quéa a cáhan ndo ña cúu ndó na ndichí. Jáchí mé da ndichí co cajú cáhnu da mé dá ta co cáhan túhún da jáchí mé a ndaa cúu dá taa ndichí. ¹⁵Joo tá cajú cáhnu da mé dá já quéa cándaa ini ndó ña co ndichí jini dá nu Ndióxi jáchí tuhun cáhan da coó naquixi a indiví nu íin Ndióxi. Cáhan da tuhun ñayivi ñuyívi yóho va ta jini mé va da vaxi a. Ta tuhun cáhan da cúu á tuhun núu, ña quixi nuú tiñáhá sacuahá. ¹⁶Jáchí nu ndúu na ihvi ini mé cán ndúu na co cúní táhan ta sa mé cán cáni táhan na ta cajú na tóco ndihi nuú cuachi. ¹⁷Joo na ndichí jini cáhan na tuhun quíxi indiví nu íin Ndióxi. Ndinuhu ña vaha cajú na ta co xójo ini na xihín ñayivi. Cajú cáhnu ini na sahá ñayivi. Co xíxi ini na xihín ñayivi jáchí táhnda ini na sahá ná. Cajú na ña vaha cuití va. Cáhan na ña ndaa cuití va ta co jándahvi na ñayivi. ¹⁸Vatí cúní ñayivi cáni táhan na xihín na ndichí joo ndúcú na coo vaha ini na xihín ndihi ñayivi ta já cúu ná ñayivi ndaa nu Ndióxi.

A cándico toho ndó íchi cuénta na ñuyívi

4 Ndávaha ri cáni táhan ndó ta já quihvi ndó tondóhó tañu ñayivi. Cáni táhan ndó sahá ña ndicají ini ndó cajú ndó cuahá nuú cuachi ña xíca ínima ndo. Ta cúu á tátuhun cáni táhan ña vaha xihín ña núu ini ínima ndo ²jáchí xíca ini ndó coo cuahá ñaha nu ndo joo a cuú ñehe ndó a. Na cán quéa sáhní ndó ñayivi já ñehe ndó ña cúní ndo. Cáhihvi ini ndó tá xini ndo ñaha inga na ta a cuú ñehe ndó a, ña cán quéa cáni táhan ndó xihín ná. Joo co ñehe ndó ña cúní ndo jáchí co xíca tahví ndo nu Ndióxi sahá ñaha cámani nu ndo. ³Tá xíca ndo ñaha nu Ndióxi ta co sáhan mé á ñaha nu ndo já quéa cándaa vaha ini ndó ña co íin vaha ínima ndó nu Ndióxi jáchí nasacu ini ndó cajú ndó ña cúní mé cuití ndo. ⁴Tá quiahva cajú ñañáha tá jándahvi ña yíi ña xihín inga dataa quiahva já cajú ndó cuachi ña co táhan ini Ndióxi xihín. Á co cándaa ini ndó ña tá ná cajú í tá quiahva cajú ñayivi ñuyívi yóho já quéa nduú na co cúní táhan xihín Ndióxi. Ta a cuú ndique táhan mání yó xihín mé á tá ná cajú í ña núu ñuyívi yóho. ⁵Jáchí sa xini vaha ndó ña íin sahá cáhan tuhun Ndióxi tá cáchí a já: “Nachicaan Ndióxi ínima yíi mé á ini in in í jáchí cúní ndivaha mé a mí ta chí táhvi ndivaha ini a sahá yo.” ⁶Joo cajú Ndióxi cuahá ga ñamani xihín yo ta chindeé a mí. Já cáchí tuhun Ndióxi já: “Co táhan ini Ndióxi xihín ñayivi, na ndínehe jícó mé. Joo chindeé Ndióxi ñayivi vaha, mé na co ndínehe jícó mé”, cáchí tuhun Ndióxi. ⁷Ndiquiahva ndó mé ndó ndáha Ndióxi ta chicaji ndó ínima ndo nuú tiñáhá sacuahá ná a cajú ndó ña cúní ri. Anda jáví cunu rí cuhun ri. ⁸Cayati ndó nu Ndióxi ta já cayati Ndióxi nu ndo. Jándicoo ndó cuachi cajú ndó ta ndaja víi ndó ínima ndo ña ná

candico ndó in túhún íchi cuéntá Jesús cuití va. ⁹Cajuchú ini ndó ta ndahyi cóhó ndo sahá cuachi cája ndó. Ndiama ndó ña cájii ini ndó ta ná nduu a ña cacuéha ini ndó sahá cuachi ndó. ¹⁰A ndínehe jícó ndo mé ndó nu Ndióxi já quéa ndínehe jícó Ndióxi ndohó.

A cáhan núu ndó sahá inga na

¹¹Candehé ndo, ñani mí i, na cúu cuéntá Jesús. A cáhan núu sahá táhan ndó ta a candehé ndaa táhan ndó. Jáchi ndá da cáhan núu sahá inga na já cáhan núu da sahá ley Ndióxi ta sáji nuu da nu ley. Co ndítahan nu yo caji nuu í nu ley Ndióxi jáchi tá cája í já já quéa quéhe núu í ley Ndióxi ta sándehe ndaa í ña. Na ndítahan nu yo caji í quéa candúsa í ña ta caji í ña. ¹²Jáchi in túhún Ndióxi nasahan ley nu yo. Ta mé Ndióxi cúu á juéxe cáhnu nuú ndihi ñayivi ta mé á cuu caji víi a sahá cuachí. Ndióxi cuití va cuu jácacu mí ta sa mé Ndióxi cuu chindahá mí indayá. Ña cán quéa co ndítahan nu yo candehé ndaa táhan í.

Tá cáhan í sahá ña caji í itaan

¹³Ndúu java na tañu ndó ta cáchi na: “Viti á itaan cuhun tá cuhun nde in ñuu cáhnu ta cán canduu nde in cuia caji chúun nde ta ñehe cuahá nde jiuhún”, já cáchi java na. Tá cáhan ndo já ndítahan cuni johó vaha ndó ña cáhan i xihín ndo. ¹⁴Co xini toho ndó ndía ndoho ndó itaan. Co xini toho ndó ndá quivi quivi ndó. Cúu ndó tátuhun in vico ña íin too loho ta tá nandihí sa coo a. ¹⁵Vaha chága ná cachi ndó já: “Catacu nde quivi itaan tá cuni Ndióxi. Ta caji nde ña jan á ña yóho tá cuni Ndióxi”, já cachi ndó. ¹⁶Joo cája cáhnu ndó mé ndó tá cáchi ndó ña cánda ini ndó ndía ndoho ndó quivi itaan. Ta núu ndivaha cája ndó tá cája cáhnu ndó mé ndó. ¹⁷Cuachi ndácaan nuú na tiahva caji ña vaha ta co cája na ña.

Cáhan Santiago nuú na cuicá

5 Cunjohó vaha ndó na cuicá. Ndítahan nu ndó ndahyi cóhó ndo ta tahnda ini ndó jáchi vaxi quivi ndoho ini ndó. ²Nacasáhá táhyi tóco ndihi ñaha najátaca ndó ta nasaxi ndihi tiquijí jáhma ndo. ³Nacuju ndihi jiuhun cuáan xihín jiuhun cúxú ña najátaca ndó catacu vaha ndó quivi chága chí nuu. Joo co yáhvi ga viti jáchi vaxi quivi tá ñaha ña nacajihnda ndivaha ndó xihín jiuhún ndó. Tá quiahva jándihí ñuhú cáyi sahá tutu quiahva já ndihi sahá ndó tá chínúu ndó ínima ndó jatá jiuhún ndó. ⁴Candehé ndó. Mé ndó coo nachahvi ndó mozo ndo tá najácaja chúun ndó na nuú utu ndó. Ta viti sácu cóhó na ndáca na cuéntá nu ndo. Ta tá xíca tahví na nu ndo já quéa anda nu Ndióxi, mé á cáhnu ndivaha, xínu coo ña cáhan na xihín ndo. ⁵Mé ñuyiví yóho ndúu vaha ndó xihín ña cuicá ndo ta

cája ndó ña xíca ini cuití va ndó. Xíxáhan vaha ndó ta viti nandaha ndó tátuhun tindiui, rí najándaha chuun na cahní na. ⁶Ta chícaan ndó cuachi jatá ñayivi ndaa ta ndá tañu sáhní ndó ñayivi vaha, mé na a cuú chindeé mé.

A cándati númí ndó quiví quixi tucu Jesucristo

⁷Candehé ndo, ñani mí i, na cúu cuénta Jesús. A ndíhi ini ndó ta cuéé coo ini ndó candati ndó quiví quixi tucu Jesucristo, mé a cúu xitoho í. Tá quiahva ndáti in dataa jáquee da nuú utu da quiahva já ndítahan candati Jesucristo ña quixi tucu a. Jáchi sa xíni ndo ndaja cája in dataa tá ndáti da cuun vaha javi nuú tata ña nachihin da. Joo co ndáti númí dá ña ná jáquee da nu á. ⁸Quiahva já ndítahan cuéé coo ini ndó candati ndó quiví quixi tucu Jesucristo. Cacu ndacú ndó ínima ndo jáchi jalóho cúní ndindaa quiví quixi tucu Jesucristo. ⁹Candehé ndo, ñani mí i. A cáhan cuachi nu táhan ndó ná a jándoho Ndióxi ini ndó. Ta viti jalóho cúní quixi Ndióxi, ña cúu juéxe cáhnu caja víi a sahá cuachi ñayivi. ¹⁰Á co ndícuhun ini ndó, ñani mí i. Sanahá ndivaha mé na profeta Ndióxi nacahan na tuhun Ndióxi nuú ñayivi. Tá quiahva nasahan ndeé ini na tá nandoho ini na quiahva já ndítahan nu mí quiahva ndeé iní tá ná casaa quiví ndoho iní. ¹¹Ta ñéhe táhvi mé profeta ña cájii ini na viti jáchi nasahan ndeé ini na tá nandoho ini na. Á coó naxini johó ndó saha in da naní Job. Vatí nandoho ndivaha ini da joo nasahan ndeé ini da tá nandoho ini da já quéa nacaja cuahá Ndióxi ñamaní xihin dá. Xihín ña yóho cándaa iní ña táhnda ini Ndióxi sahá ñayivi jáchi quíhvi ini a na.

¹²Cuni johó vaha ndo, ñani mí i jáchi cáhnu chága tuhun yóho nuú ndihi tuhun. Co ndítahan tává ndo quiví indiví ni quiví ñuyiví ni quiví inga ñaha. Jáchi ndítahan cahan ndó ña ndaa cuití va. Ta tá ndúcú ñehe ndó tuhun já cáchí ndó já: “ajan”, á tá coó já cáchí ndó: “uhun.” Já cuití va cachi ndó ná a jándoho Ndióxi ini ndó.

¹³Tá íin in na ndóho ini tañu ndó, ndítahan nu ná caca tahví na nu Ndióxi sahá ña ndóho ini na. Tá íin in na cájii ini tañu ndó, ndítahan nu ná cata na nu Ndióxi já ná caja cáhnu na mé á. ¹⁴Tá íin in na quíhvi tañu ndó já quéa ndítahan nu ná caca na ñamaní nuú na sacuahá veñuhu ña ná quixi na caca tahví na nu Ndióxi sahá ná. Ta ná cuyu na sítí jiní na quíhvi ña ná ndivaha na. ¹⁵Ndítahan nu ndó candee ini ndó Ndióxi tá ná caca tahví ndo nu á sahá na quíhvi já quéa ndivaha na quíhvi caja Ndióxi. Ta tá nacaja na cuachi já quéa caja cáhnu ini Ndióxi sahá cuachi na. ¹⁶Ña cán quéa ndítahan nu ndó nahma nu táhan ndó cuachi ndó. Ta ndítahan nu ndo caca tahví ndo nu Ndióxi sahá ndaja táhan ndo já quéa ndaja vaha Ndióxi ndohó tá quíhvi ndo. Jáchi chindeé Ndióxi ñayivi vaha tá xihín

ndinuhu ínima ná xíca tahví nā nū mé á. ¹⁷Á cō ndícuhun ini ndó dā naní Elías, dā nasacuu profeta sanahá. Nasacuu da ñayivi tátuhun mí. Ta xihín ndinuhu ini da naxíca tahví dā nū Ndióxi ñā ná a cúun javi. Ñā cán quēa tañu uní cuiā java cōó nacuun toho javi. ¹⁸Ta tá nāndihi cán naxíca tahví tucu dā nū Ndióxi ñā ná casáhā cuun tucu javi. Ñā cán quēa nacasáhā cúun tucu javi chí nanana ndihi yucū cuíi ñundáhyi cán.

¹⁹Candehé vaha ndó, ñani mí i, nā cúú cuéntā Jesús. Tá íin in na tañu ndó ta najándicoo na íchi cuéntā ñā ndaa ta tá in ndó najándicó cōo ndó nā cán ñā ná caca tucu na íchi cuéntā Jesús ²⁰já quēa najácacu ndó mé nā cán ñā ná a cúhun toho na indayá. Ta já caja cáhnu ini Ndióxi sahā cuahā cuachi nacaja na.